

淨土五經

(合刊)

佛陀教育基金會 印贈

淨土五經

一、佛說無量壽經義疏

二、觀經智者疏妙宗鈔

三、佛說阿彌經要解講義

四、勢至念佛圓通章疏鈔

五、普賢行願輯要疏

(刊合)

中華民國八十五年六月恭印一五〇〇本

淨土五經合刊

普爲出資及讀誦受持
輾轉流通者回向偈曰

願以此功德 消除宿現業

增長諸福慧 圓成勝善根

所有刀兵劫 及與饑饉等

悉皆盡滅除 人各習禮讓

讀誦受持人 輾轉流通者

現眷咸安樂 先亡獲超昇

風雨常調順 人民悉康寧

法界諸含識 同證無上道

發行人 ☐ 孔服農

出版者 ☐ 財團法人佛陀教育基金會

地址 ☐ 台北市杭州南路一段五十五號十一樓

電話 ☐ (〇二) 三九五一一九八

傳真 ☐ (〇二) 三九一三四一五

劃撥帳號 ☐ 〇七六九四九七九

戶名 ☐ 佛陀教育基金會

贈送處 ☐ 佛陀教育基金會附屬華藏講堂

台北市杭州南路一段五十五號三樓

行政院新聞局出版事業登記證局版臺業字第三八六九號

贈送品・歡迎翻印・功德無量

敬請
常念

南無阿彌陀佛・求生淨土
南無觀世音菩薩・消災降福

目次

一、佛說無量壽經疏……………1

二、觀經智者疏妙宗鈔……………219

三、佛說阿彌經要解講義……………443

四、勢至念佛圓通章疏鈔……………755

五、普賢行願品輯要疏……………847

佛說無量壽經義疏卷一

原疏離經別行
今將經疏合刻

曹魏天竺三藏 康僧鎧 譯經

隋京師淨影寺沙門慧遠 撰疏

疏聖教不同。略要唯二。一聲聞藏。二菩薩藏。教聲聞法。名聲聞藏。教菩薩法。名菩薩藏。聲聞藏中。所教有二。一聲聞聲聞。二緣覺聲聞。聲聞聲聞者。是人先來求聲聞道。常樂觀察四眞諦法。成聲聞性。於最後身。值佛爲說四眞諦法。而得悟道本聲聞性。今復聞聲而得悟道。是故名爲聲聞聲聞。經言爲求聲聞者說四諦法。此之謂也。緣覺聲聞者。是人本來求緣覺道。常樂觀察十二因緣。成緣覺性。於最後身。值佛爲說十二緣法。而得悟道。本緣覺性。以最後身聞聲悟道。是故號曰緣覺聲聞。經言爲求緣覺者說十二緣。據此爲言。成二雖殊。同受小法。並於現在聞聲悟道。是故對斯二人所說。爲聲聞藏。菩薩藏中。所立亦二。一漸。二頓。言漸入者。是人過去曾學大法。中間習小。證得小果。後還入大。大從小來。稱之爲漸。故經說言。除先修習學小乘者。我今亦令入是法中。此是漸入。言頓悟者。有諸衆生。久習大乘相應善

根。今始見佛。則能入大。大不由小。目之爲頓。故經說言。或有衆生。世世已來。常受我化。始見我身。聞我所說。即皆信受。入如來慧。此是頓悟。漸入菩薩。藉淺階遠。頓悟菩薩。一越解大。頓漸雖殊。以其當時受大處一。是故對斯二人所說。爲菩薩藏。聖教雖衆。不出此二。故龍樹云。佛滅度後。迦葉阿難。於王舍城。結集法藏。爲聲聞藏。文殊阿難。於鐵圍山。集摩訶衍。爲菩薩藏。地持亦云。佛爲聲聞菩薩行出苦道。說脩多羅。結集經者。集爲二藏。以說聲聞所行。爲聲聞藏。說菩薩行。爲菩薩藏。故知聖教。無出此二。此二亦名大乘小乘。半滿教等。名雖反改。其義不殊。今此經者。二藏之中。菩薩藏收。爲根熟人頓教法輪。云何知頓。此經正爲凡夫人中。厭畏生死。求正定者。教令發心生於淨土。不從小大。故知是頓。

〔疏〕已知分者。次釋其名。今言佛說無量壽經者。蓋乃標經部別名也。諸經所以皆首題其名。爲示所明法。此經宗顯無量壽佛所行所成。及所攝化。故始舉之。但彼諸經得名不同。或但就法。如涅槃等。或唯就人。如提謂經。太子經等。或單就事。如枯樹經等。或偏就喻。如大雲經。寶篋經等。或有就時。如

時非時經。或就處所。如楞伽經。伽耶山頂經等。或人法雙題如維摩經。勝鬘經等。或事法並舉。如彼方等大集經等。或法喻並彰。如華嚴經。法華經等。或人法雙舉。如舍利子問疾經等。如是非一今此經者。就人爲名。初列人。凡有四種。一舉說人。如維摩等。二舉問人。如文殊問等。三舉所說之人。如太子經等。四舉所化之人。如須摩提女玉瑯經等。今此經首。通舉能說及所說人。初言佛者。舉能說人。無量壽佛者。舉所說人。起說不同。凡有五種。如龍樹說。一佛自說。二聖賢說。三諸天說。四神仙等說。五變化人說。此經佛說。爲簡餘四。是故舉佛。佛者。外國語也。此翻名覺。覺有兩義。一覺察名覺。對煩惱障。煩惱侵害。事等如賊。唯聖覺知。不爲其害。故名爲覺。此之一義。如涅槃釋。二覺悟名覺。對其智障。無明眠寢。事等如睡。聖慧一起。朗然大悟。如睡得悟。故名爲覺。所對無明。有其二種。一是迷理性結無明。迷覆實性。對除於彼變妄契真。悟實名覺。二事中無知。迷諸法相。對除於彼。悟解一切善惡無記三聚等法。故名爲覺。故持地云。於義饒益聚。非義饒益聚。非非義饒益聚。平等開覺。故名爲佛。義益是善。非義是不善。非非義

是無記。於此悉知。故名爲覺。既能自覺。復能覺他。覺行窮滿。故名爲佛。言自覺者。簡異凡夫。導言覺他。別異二乘。覺行窮滿。分異菩薩。是故獨此偏名爲佛。口音陳唱。目之爲說。無量壽者。是其所說。此經宣說無量壽佛所行所成及所攝化。言所行者。宣說彼佛本所起願。本所修行。言所成者。說今所成法身淨土二種之果。言所攝者。普攝十方有緣衆生。同往彼國。道法化益。名爲所攝。又今一切諸菩薩等。學其所行。得彼所成。同其所攝。名所攝矣。此等差別。不可備舉。攝德從人。是故但云說無量壽。佛名有二種。一通。二別。如來應供等。是其通名。釋迦彌勒無量壽等。是其別稱。別中立名。乃有種種。或從種性。如釋迦佛。迦葉佛等。或從色身。如身尊佛。身上佛等。或從音聲。如妙音佛。妙聲佛等。或從光明。如普光佛等。或從內德。或就譬說。如是非一。此佛從其壽命彰名壽有真應。真即常住。性同虛空。應壽不定。或長或短。今此所論。是應非真。於應壽中。此佛壽長。凡夫二乘不能測度知其限算。故曰無量。命限稱壽。云何得知是應非真。如觀世音及大勢至授記經說。無量壽佛壽雖長遠。亦有終盡。彼佛滅後。觀世音大勢至次第作

佛。故知是應。經者。外國名脩多羅。此翻名經。聖人言說。能貫諸法。如經貫華。故名爲經。而言經者。經能貫華。經能持縵。其用相似。故名爲經。若依俗訓。經者常也。人別古今。教義常楷。故名爲常。經之與常。何相關顧。將常釋經。釋言經者。是經歷義。凡是一法。經古歷今。恆有不斷。是其常義。故得名常。

此經始終。文別有三。序。正。流通。初至對曰願樂欲聞。是其由序。佛告阿難乃往過去久遠已下。是其正宗。佛語彌勒其有得聞彼佛名號歡喜已下。是其流通。化必有由。故先明序。由序既興。正陳所說。故次第二辨其正宗。聖者說法。爲利羣品。說經既竟。歎勝勸學。付屬傳持。故次第三辨其流通。

疏序中文義。雖復衆多。義要唯二。一發起序。二證信序。佛將說經。先託時處。神力集衆。起所說宗。名爲發起。與說爲由。名發起序證信序者。佛說經竟。阿難稟承。將傳末代。先對衆生。言如是法。我從佛聞。證成可信。名爲證信。以此證與傳經爲由。名證信序。以何義故立此二序。由經二故。經唯是一。何曾有二。經體雖一。約人隨時。故得分二。一如來所說經。二阿難所傳

經。如來所說。益在當時。阿難所傳。傳之末代。對此二經。故立兩序。對如來所說。立發起序。對阿難所傳。立證信序，然此二序。更有多義。備如常釋。

文中初言如是我聞。是證信序。一時以下。義有兩兼。若取本事起發之義。判屬發起。阿難引來證成可信。名爲證信。義既兩兼。不可偏取。

如是我聞

藏本作我聞如是今依疏本

證信序中。三門分別。一釋如是我聞有之所由。二明立意。三釋其文。

疏有所由者。何緣經首悉有如是我聞之言。由佛教置。佛何緣教。阿難請故。彼何因請。由彼阿泥樓陀教故。阿泥樓陀何緣故教。由見阿難心憂惱故。阿難比丘何故憂惱。由見如來般涅槃故。佛將滅度。在於雙林北首而臥。是時阿難以佛將滅。悲啼涕泣不能自勝。阿泥樓陀開覺阿難。汝傳法人。何不請佛未來世事。徒悲何益。阿難對曰。我今心沒憂海。知何所問。阿泥樓陀遂教阿難請問四事。一問世尊滅後。諸比丘等以何爲師。二問世尊滅後。諸比丘等依何而

住。三問惡性比丘。云何共居。四問一切經首。當置何字。阿難被教。心少惺悟。遂依請佛。佛隨答之。諸比丘等以何爲師者。當依波羅提木叉爲師。若我住世無異於此。木叉是戒。比丘所學。故說爲師。言諸比丘依何而住者。當依四念處住。何謂四念處。所謂比丘依內身修身觀。精勤除世貪愛。如是依外身。內外身。受心法亦如是。是謂比丘所依住處。故經說言。若住四念處。名目境界。不爲魔縛。若住五欲。名魔境界。爲魔所縛。惡性比丘云何共居者。梵檀治之。梵檀是其默不共語。若心調伏。爲說離有無。言一切經首置何字者。當置如是我聞佛在某方聚林等六事。由佛教故。一切經首得著如是我聞。此初門竟。次辨立意。佛本何意教置此語。爲生物信。如是。云何得生信也。其如是者。阿難彰己信順佛語。導佛所說如。言佛所說是。令他衆生同己生信。其我聞者。若爲生信。阿難自是不足之人。若言此法是己所說。人多輕謗。由言此法從佛聞故。人皆歸信。信有何義。須立此言而生信乎。釋言。信者。入法初門。攝法上首。凡入佛法。要先起信。故華嚴中說信爲手。如人有手。至珍寶處隨意採取。若人無手。空無所獲。如是入佛法者。有信心手。隨

意採取道法之寶。若無信心。空無所得。信有此義。故立如是我聞之言。以生物信。立意如是。此兩門竟。次釋如是我聞之言。其如是者。解有兩義。一約法釋。阿難導佛所說之言。如於諸法。故名爲如。說理如理。說事如事。說因如因。說果如果。凡所論者。皆如前事。故名爲如。如法之言，是當道理。故名曰是。良以乘法。名爲非是。故如法之言。得稱爲是。二約人解。阿難導今釋迦所說。如於過去一切佛說。故名爲如。故涅槃經云。如過去佛所說不變。故名如來。乖諸佛說。其言則非。如諸佛說。其言則是。故曰如是。言我聞者。阿難對彼未來衆生。陳已餐說。故曰我聞。聞實是耳。何得云我。諸根之別。皆我用具。就主以彰。故云我聞。法中無人。何處有主。而言就主稱說我聞。釋言。法中雖無定主。非無假名綰御。亦得稱我。故涅槃云。譬如四兵。合以成軍。雖無定主。亦得稱言。我軍勇健。我軍勝彼。此亦如是。問曰。阿難得理聖人。以何義故同凡說我釋言。阿難雖復說我。不同凡夫。云何不同。說我有三。一見心說我。謂諸凡夫我見未亡。我見心中稱言有我。二慢心說我。謂諸學人。我見雖亡。慢心猶在。我慢心中稱說爲我。三世流布我。謂無

學聖人。見使久亡。慢使亦盡。隨世流布假名說我。然今阿難結集法時。身居無學。見慢亡除。隨世流布假名說我。故不同凡。問曰。我者假名世諦。無我真諦。真諦是勝。何不就勝宣說無我。乃從世諦假名說我。釋言。化我凡夫法須如是。若不說我。何由可得標別彼此。令人識知。故須說我。是故乃至諸佛爲化。亦常說我。智者不怪。

一時已下。義雖兩兼。對前一向證信序故。自下偏就發起以釋。於中有三。一明佛化主。二從與大比丘已下。辨其徒衆。三爾時世尊諸根悅下。如來現化而爲發起。阿難啓請。

一時佛住王舍城耆闍崛山中。

疏前中一時。舉佛化時。言其佛者。舉佛化人。住王舍等。舉佛化處。言一時者。人有異釋。今正論之。爲化之辰。因之爲時。於佛一代。化時衆多。簡別餘時。是故言一。一時之言。經中大有。如涅槃說。我於一時在王舍城。與彌勒菩薩共論世諦。我於一時在恆河岸。我於一時在尸首林。此言似彼。佛如前

釋。住王舍者。約城通舉。此城古昔多有王住。名王舍城。耆闍崛山。隨處別指。遶王舍城。具有五山。皆有精舍。簡別餘處。是故須言耆闍崛山。此翻名爲靈鷲山也。此山多有靈仙居住。故名爲靈。亦有鷲鳥居止此山。故名爲鷲。又亦名爲鷲頭山矣。多有靈鷲居此山頂。名鷲頭山。又此山頂似鷲鳥頭。名鷲頭山。遊化處中。目之爲住。法身平等。實無棲託。示化在方。故云住耳。何不就實。乃託化乎。爲通化教。故須從化。

疏第二衆中。先列聲聞。後彰菩薩。諸經多爾。何故而然。凡釋有四。一近遠分別。諸聲聞人。多近如來。故明佛後。隨近先列。菩薩之人。多不近佛。爲是後列。聲聞何故偏近如來。菩薩不近。解有兩義。一聲聞之人。習道未久。未閑道法。雖得聖果。進止威儀。常順佛教。如律經中。制阿那律不聽與彼女人同宿。制娑伽陀不聽飲酒。制十七童子不聽在於水中戲等。皆是羅漢順佛教制。乃至如來般涅槃。制諸聲聞不聽食完。爲是近佛。菩薩之人。久閑道法。不假佛教。故不近佛。二聲聞之人。現蒙佛度。捨凡成聖。荷恩深重。雖得聖果。常隨如來。圍侍供養。故多近佛。菩薩之人。雖荷佛恩。化衆生事。隨緣

攝化。多不近佛。以彼聲聞多近如來。故先標列。菩薩不爾。故在後列。此是第一近遠分別。二就威儀形相分別聲聞人等。執持威儀。形相似佛。世共尊敬。故在先列。菩薩隨化。形儀不定。故在後列。如彼文殊一夏之中。三處安居。即是事也。三就治分別。亦得名爲約教分別。如龍樹釋教有二種。一者顯示。二者秘密。依顯示教。羅漢辟支。同佛漏盡。故舉佛後。先列聲聞。菩薩隨化。現處諸漏。示爲凡夫。世人若聞在羅漢上。人多驚怪。是故後列。諸經之中。先列聲聞。多皆據此。若依甚深秘密之教。菩薩德尊。宜在先列。聲聞德劣。須在後列。故華嚴經。先列菩薩。至後祇洹重閣會中。方列聲聞。四多少分別。如涅槃說。一切衆中。少者先列。多者後列。於彼經中。聲聞衆少。故在先列。菩薩衆多。故在後列。此後一義。局在涅槃。餘通衆經。今此且依前之二義。先列聲聞。後彰菩薩。

聲聞衆中。文別有四。一標其衆別。二辨其數。三歎其德。四列其名。

與大比丘衆。

疏初標其衆。此乃約佛以明其衆。以身兼彼。稱之爲與。大者。外國名曰摩訶。義翻有三。一名爲衆如世多人。名爲大衆。二名爲勝。勝過餘學。於彼九十五種道中。最爲勝上。故曰摩訶。三名爲大。曠備高德。過餘近學。故名爲大。比丘胡語。此翻有五。一名怖魔。初出家時。發心廣大。令魔戰怯。故曰怖魔。如涅槃說。魔云何怖。魔性妬弊。忌他勝己。見彼勝己。故懷恐怖。又懼其人多化衆生。同出生死。空其境界。故生恐怖。此之一義。就始彰名。二名乞士。既出家已。無所貯畜。乞求自活。故曰乞士。三名淨命。於乞求時。正命乞求。離於邪命。故曰淨命。此之兩義。據中立名。四名淨持戒。既出家已。精持禁戒。無所毀犯。名淨持戒。五名破惡。以持戒故。離犯戒過。故曰破惡。此後兩義。據終立稱。人多名衆。

萬二千人俱。

疏二辨其數。共集稱俱。

一切大聖神通已達。

疏三歎其德。一切大聖。歎其人高。舉一例餘。故云一切。鈍根近學不能過故。名之爲大。大有二義。一位高名大。如下所列了本際等。皆是究竟無學聖人。過餘近學。故名爲大。二德勝名大。此等皆是利根聲聞。成就聖德。故名爲大。會正名聖。神通已達。歎其德勝。所爲神異。故名曰神。無壅曰通。通別有六。所謂身通。天眼。天耳。他心。宿命。及與漏盡。廣如別章。此應具論。此諸比丘。於小乘中修成畢竟。故曰已達。問曰。阿難於佛在世。身居學地。未得漏盡。云何得名一切大聖神通已達。釋言。阿難雖居學地。未名大聖神通已達。從多以歎。是故說言一切大聖神通已達。問曰。阿難德實未周。何須在此衆中列之。釋言。阿難此會請主。應須並列。又復阿難增上利根。雖居學地。而成無量勝妙功德。故曰大聖於神通中解了畢竟。亦名已達。上來歎德。